

L daz sun i joufs ne é nia la resposta

La minonga dl conseier provincial y vize-president dl Consei regional Luigi Chiocchetti en cont dla regolamentazion dl trafich sun i joufs

An scomencia da nuef a rejoné dla scluta y dla regolamentazion dl trafich di joufs y ie vuei sotlinié mia convinzion che l'istituzion dl daz per passé sun i joufs, sostegnuda da la provincia de Bulsan, ne é nia na resposta efizienta per ressolve l'problem dl trafich y dl entossiamet te chisc raions. Sce l'obietif é chel

de stravardé l'ambient y ti sporje ai residenc y ai turisc l met de se empervalei y se gode les belezes de nost teritore con plu coscienza, spo à l'esperiment dl Timmelsjoch-Passo Rombo (lascian da na man l'aspet economich) mostré de ne avei nia joé. Ie rate segur mioura na soluzion che porta a n

smendrament fort dl trafich privat, tres la istituzion de bus naveta y la doura di implanc portamont che é bele, sfrutan te chest cajo les structures y les technologies bele a la leta y valorisan sies potenzialités. La soluzion tutta su per l'turism da d'invern, l'carousel dai schi dl Superski Dolomites, che ti dà la poscibelté a chi che va con i schi de rodé entour al Sela duran demé i implanc portamont, podessa ester la resposta drete ence per l'turism da d'isté. Al se trata samben de fé cernudes emportantes y de tò dezijions fortes per sostegni na doura y na defendura dl paesaje, cialan tl medem temp de ne penalisé nia chi che mess passé per laour

o chi che à sia ativité sun i joufs. Dutes les provincies toutes ite, Trent, Bulsan y Belun, mess afronté l'problem a na maniera unitara: ie rate fundamental la creazion de na meisa torona che tole ite, aldilà di dirigenc dles trei provincies, ence i comuns, i reprejentanc dles comunitàs interessedes, i implantisc, i operadours turistics, les Apt y e. i. a na vida de favorì n confront per ruvé a soluzions azetedes da duc. Demé tres l'dialogh y na partezipazion responsabla tl segn dla colaborazion defat sarà poscibel abiné idees efizientes per dé na resposta de valuta ence per l'davegnì a la problematica dl trafich sun nusc joufs.

Ie vuei recordé che l'reconesciment dles Dolomites sciche patrimoine Unesco dl'Umanité reprejenteia segur na gran oportunité, ma al nes ciaria duc nos ence de na gran responsabelté: chela de stravardé (y nia demé sfruté) nost teritore. Al é na oblianza de duc donca cialé de passé sourafora i confins, i preconzec, i interes de pert y i particolarismes, y mete en ciamp intelet, atenzion, cura y fundament con l'obietif de crié condizions sostegnibles per n ecosistem tant marevueious y auter tant delicat sciche chel dles Dolomites y per duc chi che viv, se muev y laora chilò.

Luigi Chiocchetti, conseier provincial

